

ZAKON O IZMIRENJU OBAVEZA NA OSNOVU RAČUNA STARE DEVIZNE ŠTEDNJE U FEDERACIJI BOSNE I HERCEGOVINE

PREČIŠĆENI TEKST:

"Službene novine Federacije BiH", broj 64/09 /12.10.2009./, «Službene novine Federacije BiH», broj 44/11 /20.7.2011./, «Službene novine Federacije BiH», broj 92/13 /22.11.2013./

I OPĆE ODREDBE

Član 1.

Ovim Zakonom uređuju se postupak, načini i rokovi izmirenja obaveza Federacije Bosne i Hercegovine (u daljnjem tekstu: Federacija) po osnovu računa stare devizne štednje deponovane u domaćim bankama na teritoriji Federacije za koje, u smislu Zakona o izmirenju obaveza na osnovu računa stare devizne štednje ("Službeni glasnik BiH", br. 28/06, 76/06 i 72/07 - u daljnjem tekstu: Zakon o izmirenju obaveza), sredstva osigurava Federacija.

Član 2.

U smislu ovog Zakona pod računima stare devizne štednje podrazumijevaju se devizna sredstva deponovana kod banaka ili njenim filijalama ili najnižim operativnim jedinicama koje su poslovale na teritoriji Federacije sa stanjem na dan, 31.12.1991. godine, uključujući kamatu obračunatu do tog datuma, a umanjenu za direktne isplate banke nakon tog datuma, za prenesena i iskorištena sredstva sa jedinstvenog računa u Federaciji i jedinstvenog privatizacijskog računa u Republici Srpskoj i Brčko Distriktu Bosne i Hercegovine i za eventualne isplate poslije 31.12.1991. godine po bilo kojem drugom osnovu. Izmirenje obaveza prema ovom Zakonu zasniva se na lokaciji svakog depozita u banci ili njenim filijalama ili najnižim operativnim jedinicama koje su poslovale na teritoriji Federacije. Računi stare devizne štednje definirani stavom 1. ovog člana ne obuhvaćaju račune stare devizne štednje u filijalama Ljubljanske banke, Invest banke i drugih stranih banaka na teritoriji Federacije, odnosno Bosne i Hercegovine.

Član 3.

Obračunata i neisplaćena kamata prema ugovorima iz člana 1. ovog Zakona nakon 01.01.1992. godine se stornira i od tog datuma pa do stupanja na snagu Zakona o izmirenju obaveza vrši se novi obračun kamata po godišnjoj stopi od 0,5%.

II VERIFIKACIJA

Član 4.

Verifikacija potraživanja i gotovinska isplata vrši se u skladu sa Zakonom o izmirenju obaveza i Uredbom o postupku verifikovanja tražbina i gotovinskih isplata po osnovu računa stare devizne štednje u Federaciji Bosne i Hercegovine ("Službene novine Federacije BiH", br. 33/06, 66/06, 5/07, 65/07 i 7/09 - u daljnjem tekstu: Uredba).

Član 5.

Postupak verifikacije potraživanja završit će se najkasnije do **31.12.2015.** godine. Obaveze po osnovu računa stare devizne štednje koje nisu verifikovane mogu se dokazivati i ostvarivati samo u sudskom postupku u skladu sa odredbama Zakona o izmirenju obaveza.

III EMISIJA OBVEZNICA

Član 6.

Obaveze po osnovu računa stare devizne štednje koje nisu izvršene isplatom u gotovini, u skladu sa odredbama Zakona o izmirenju obaveza i Uredbe, izmiruju se putem obveznica stare devizne štednje (u daljnjem tekstu: obveznice). Izuzetno od odredbi stava 1. ovog člana, obveznice se neće emitovati za iznose koji ne prelaze 100,00 KM. Za račune stare devizne štednje koji su verifikovani do 31.12.2008. godine, obveznice će se emitovati do 30.09.2009. godine. Obaveze po osnovu stare devizne štednje koje su verifikovane nakon 01.01.2009. godine, a nisu isplaćene u gotovini izmiruju se putem obveznica pod uvjetima propisanim ovim Zakonom koje će se emitovati najkasnije do 31. marta naredne godine u odnosu na godinu u kojoj je izvršena verifikacija.

Član 7.

Obveznice su neograničeno prenosivi vrijednosni papiri, emitovani u nematerijaliziranom obliku - elektronskom zapisu, emitovane u seriji na osnovu kojih vlasnici obveznica imaju pravo na naplatu glavnice i kamate u skladu sa ovim Zakonom i odlukom Vlade Federacije o emisiji.

Član 8.

Obveznice emituje Federacija pod sljedećim uvjetima: vrsta obveznice: dugoročna obveznica sa kamatnim prinosom (kuponom) na ime; nominalna vrijednost jedne obveznice: jedna konvertibilna marka; nominalna vrijednost emisije: utvrđuje se odlukom Vlade Federacije; rok dospjeća: do sedam godina od dana emisije; kamatna stopa: fiksna - 2,5% godišnje.

Član 9.

Odluku o emisiji obveznica donosi Vlada Federacije. Odluka o emisiji obveznica obavezno sadrži: opće podatke o emitentu, datum donošenja odluke o emisiji obveznica, tip emisije, redni broj emisije i oznaku vrste, broj, nominalnu vrijednost obveznica kao i ukupnu vrijednost emisije,

dospijeće, visinu kamate, način i rokove za isplatu glavnice i kamate, ukupan broj i vrijednost do sada emitovanih obveznica iste klase, prava i ograničenja prava sadržanih u obveznici, podatke o uvrštenju obveznica na službeno berzansko tržište Sarajevske berze d.d. Sarajevo (u daljnjem tekstu: SASE), način obračuna i utvrđivanja kamate po rokovima dospijeća, druge elemente bitne za provođenje ovog Zakona. Sastavni dio odluke o emisiji je i otplatni plan kojim se utvrđuju rokovi otplate glavnice i kamate. Odluka o emisiji objavljuje se u "Službenim novinama Federacije BiH" i najmanje u jednom dnevnom listu dostupnom na teritoriji Bosne i Hercegovine.

Član 10.

Poslove po osnovu emisije obveznica obavlja Federalno ministarstvo finansija (u daljnjem tekstu: Ministarstvo).

Vlada Federacije, na prijedlog Ministarstva, može odrediti agenta za pružanje usluga po osnovu emisije obveznica (u daljnjem tekstu: agent).

Prava i obaveze agenta reguliraju se ugovorom zaključenim sa Ministarstvom.

Federalni ministar finansija će u roku od 30 dana od dana stupanja na snagu ovog Zakona donijeti propise kojima će se bliže urediti način obavljanja poslova na osnovu emisije obveznica.

Član 11.

Obveznice ne podliježu propisima i odobrenju Komisije za vrijednosne papire Federacije Bosne i Hercegovine.

Član 12.

Obveznice će biti uvrštene na službeno berzansko tržište SASE.

Na trgovanje obveznicama na sekundarnom tržištu primjenjuju se propisi kojima se uređuje tržište vrijednosnih papira.

IV PRIJELAZNE I ZAVRŠNE ODREDBE

Član 13.

Izvršne sudske presude po osnovu računa stare devizne štednje sudovi su dužni dostaviti Ministarstvu radi izvršenja.

Presude iz stava 1. ovog člana mogu dostaviti i potražioc.

Izvršenje presuda iz stava 1. ovog člana vrši se u skladu sa članom 2. stav 2. ovog Zakona i u visini predviđenoj na određenoj poziciji budžeta i u skladu sa Zakonom o izvršavanju budžeta Federacije Bosne i Hercegovine.

Član 14.

Ovaj Zakon stupa na snagu narednog dana od dana objavljivanja u "Službenim novinama Federacije BiH".

PREDSJEDAVAJUĆI
DOMA NARODA
PARLAMENTA FEDERACIJE BiH

Stjepan Krešić

PREDSJEDAVAJUĆI
PREDSTAVNIČKOG DOMA
PARLAMENTA FEDERACIJE BiH

Safet Softić
